

UPA2024/159: Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu naalakkersuisunut kaammattuutigaa nunani avannarlerni efterskolit akornanni suleqatigiinnerup annertusineqarnissaanut periarfissat misissoqqullugit, tassungalu ilanngullugu atuartut efterskolimiinnermut aningaasanik qinnuteqateqarsinnaanissamut periarfissaat misissoqqullugit.

(Aallartitat siulittaasuat, Doris J. Jensen, Siumut)

Akissuteqaat

(Meeqqanut, Inuusuttunut, Ilinniaritaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Naalakkersuisut aallartitat siulittaasuat, Doris J. Jensen, Nunani Avannarlerni Killerni efterskolit suleqatigiinnerulernissaannik kiisalu atuartut efterskolernissaminnut aningaasanik tapiiffigineqarsinnaanerannut periarfissanik misissuinissamut siunnersuutaanut qutsavigaat.

Naalakkersuisut Nunat Avannarliit Killiit akunnerminni suleqatigiinnerunissaannik ataatsimooqatigiinnerunissaannillu takorluuineq paasivaat tapersorsorlugulu, pingaartumik inuusuttut imminnut ilisareqatigiinnerat kultuurilu aqutigalugit.

Efterskole qallunaat atuartitseriaaserivaat, inuusuttut 14-nit 18-illu akornanni ukioqartut meeqqat atuarfianni ukiuni kingullerni atuarfigineqartartumik ataatsimik arlaqartunilluunniit ingerlatsivigisinnaasaat. Danmarkimi efterskolit 240-it missaanniipput, assigiinngitsunik piunasaqaatitaqartunik, inissisimaffeqartunik, klasseqartunik, atuartitsissuteqartunik pingaartitaminnillu tunngaveqartunik. Efterskolit nalinginnaasut saniatigut efterskoleqarpoq naqinnernik ilisarsisinnaanngitsunut aammalu efterskoleqarluni atuartunut immikkut pisariaqartitsisunut. Nunatsinni marlunnik efterskoleqarpoq, Savalimmiunilu aamma marlunnik efterskoleqarluni.

Nunani Avannarlerni Killerni inuusuttut angalanerulernerat paarlaaqatigiittarnerilu ataatsimoorluta kinaassutsitsinnut immitsinnullu ilisarisimanitsinnut pitsaasumik kinguneqartussaavoq. Naalakkersuisut NGK-mik (Nordatlantisk gymnasieklasse-qarnermik) misilittakkat iluatsilluartut aamma maluginiarpaat, ilinniaritaanerup iluani nunat arlaqartut akunneranni suleqatigiinnerup naleqassusaanik takutitsisuummat.

Naalakkersuisut erseqqissaateqarfigisariaqarpaat, siunnersuutip piviusunngortinnissaanut unamminarsinnaasunik arlaqartunik akimmisaarfeqarsinnaammat. Matumani pineqarput Islandimi, Savalimmiuni nunatsinnilu efterskoleqarnermut inatsiseqarnerit. Taamaattumik erseqqissassallugu pingaaruteqartuuvoq, efterskolernermut aningaasartuutunik allannguinerit suulluunniit, kiisalu atuarfiit ingerlanneqarnerannut aningaasartuutit efterskoleqarnerlu pillugu inatsisinik allannguinerit isumaliutigilluagaasussaammata. Tamanna suliaasinnaavoq unamminartoqarfiusoq, politikikkut nukissanillu piunasaqaateqarfiusoq.

Naalakkersuisut inatsiliassaminni efterskoleqarnermut inatsisip allanngortinnissaa salliutikkusuppaat, naatsorsuutigalugulu tamanna pillugu 2025-imi siunnersuummik saqqummiussaqaarnissartik. Tamanna tunngavigalugu Ilinniartitaanermut Naalakkersuisoqarfik Ilinniartitaanermullu Aqutsisoqarfik 2024-mi ukiaanerani efterskoleqarnermut inatsisit nalilersuiffigalugit isumasioqatigiisitsissapput. Misilittakkat isumasioqatigiisitsinermeersut efterskoleqarnermik inatsisip allanngortinneqarnissaani tullermi ilanngunneqarumaarput.

Taamaattumik Naalakkersuisut Nunani Avannarlerni Killerni efterskolertarnerni inuusuttunik peqataatitsisarnerup eqaannerulernissaanik suleqatigiiffiunerunissaanillu pisariaqartitsineq isumaqatigaat. Naalakkersuisut akimmisaarutit qaangernissaannut periarfissat ujartorusuppaat, aammalu Nunani Avannarlerni Killerni efterskolit akornanni suleqatigiinnerunissamik inassuteqaatip piviusunngortinnissaanut qaangiissutissanik nassaarnissaq siunertaralugu Savalimmiuni, Islandimi Danmarkimilu suleqatigisatsinnik oqaloqatiginninnissamut ammallutik.

Naalakkersuisut taamatut oqaaseqarlutik siunnersuutip akuerineqarnissaa inassutigaat.